



JU ZAVOD ZA MEDICINU RADA KANTONA SARAJEVO

JU ZAVOD ZA MEDICINU RADA KANTONA SARAJEVO
Bulevar Meše Selimovića broj 2, 71000 SARAJEVO, BOSNA I HERCEGOVINA

Tel.: +387 33 712 445, 521 300, 714 825

Kantonalni sud u Sarajevu pod UF/I-298/02

Fax: +387 33 712 445, 712 446

Registarski broj: 1708112535, Identifikacioni broj: 4200298890007

E-mail: zzmrs@bih.net.ba,
zzmr@bih.net.ba

Poreski broj: 01632007, Ident. br. PDV: 200298890007

Web: www.medicinarada.com.ba

Raiffeisen bank: 1610000010070066, UniCredit Bank:

3383202200468289

Intesa Sanpaolo banka : 1540012000092634

Na osnovu člana 24. Zakona o zaštiti od požara i vatrogastvu Federacije Bosne i Hercegovine ("Službene novine Federacije BiH", broj:65/09), i člana 70. Stav 3. i 4. Statuta JU Zavod za medicinu rada Kantona Sarajevo, donosim

PRAVILNIK O ZAŠTITI OD POŽARA

I OPŠTE ODREDBE

Član 1.

Radi sprječavanja izbijanja požara, otklanjanja opasnosti od požara, spašavanja radnika i imovine ugroženih požarom, ovim Pravilnikom, u skladu sa zakonskim i tehničkim propisima, uređuje se način ostvarivanja prava i obaveza, i utvrđuju druga pitanja na organizovanju, sprovođenju i unapređenju zaštite od požara u JU Zavod za medicinu rada Kantona Sarajevo u Sarajevu (u daljem tekstu: Zavod).

Član 2.

Ovim Pravilnikom posebno se utvrđuju:

- mjere zaštite od požara koje se moraju sprovesti u Zavodu;
- način vršenja unutrašnje kontrole sprovođenja zaštite od požara, te dužnosti, odgovornost i ovlaštenja radnika koji tu kontrolu neposredno vrše;
- postupak i način upoznavanja zaposlenika prilikom stupanja na rad ili raspoređivanja na drugo mjesto, kao i način obučavanja radnika u rukovanju sredstvima i opremom za gašenje požara;
- prostorije, prostori i mjesta na kojima se ne smije proizvoditi, koristiti ili prenositi otvorena vatra;
- vrste i količina opreme, te sredstava za gašenje požara, raspored opreme i sredstava, kao i vrijeme povremenog ispitivanja njihove ispravnosti;
- zadaci i odgovornosti rukovodećih zaposlenika u vezi sa sprovođenjem zaštite od požara;
- odgovornost zaposlenika zbog nepridržavanja propisanih mjera zaštite od požara;
- dužnosti i ponašanja zaposlenika u slučaju izbijanja požara.

Član 3.

Zaštita od požara organizuje se i sprovodi na svim mjestima u svim objektima i prostorijama gdje postoji opasnost od izbijanja i širenja požara u Zavodu.

Zaštita od požara obuhvata skup mjera i radnji koje se utvrđuju i preduzimaju u cilju sprječavanja izbijanja i širenja požara, otkrivanja, lokalizacije i gašenja požara, te spasavanja ljudi i materijalnih dobara ugroženih požarom.

Član 4.

Mjere zaštite od požara, propisane ovim Pravilnikom i Planom zaštite od požara, zakonskim i tehničkim propisima, i mjere koje su naređene od strane nadležnih organa, dužni su da sprovode svi radnici Zavoda i druga lica, koja se po bilo kom osnovu nalaze ili zadržavaju u objektima, prostorijama i krugu Zavoda.

Član 5.

Za organizovanje i unapređenje zaštite od požara u Zavodu, za njegovo uspješno funkcionisanje i za kontrolu utvrđenih, propisanih i naloženih mjera zaštite od požara, odgovorni su svi radnici Zavoda, svako u svom djelokrugu rada.

II MJERE ZAŠTITE OD POŽARA U ZAVODU I UPUTSTVA S OBAVEZAMA SVIH RADNIKA U POGLEDU KONTROLE I SPROVOĐENJA PROPISA IZ OBLASTI ZAŠTITE OD POŽARA

1. Plan zaštite od požara

Član 6.

Zavod je dužan izraditi i donijeti Plan zaštite od požara. Plan zaštite od požara donosi Direktor Zavoda.

Plan zaštite od požara obuhvataju mjere i aktivnosti koje se poduzimaju u cilju organizovanja preventivne zaštite, kao i obaveze i zadatke organa i lica u vezi gašenja požara i spašavanja ljudi i materijalnih dobara.

Član 7.

Planom zaštite od požara uređuje se naročito:

- procjena ugroženosti od požara;
- organizacija zaštite od požara;
- način upotrebe vatrogasnih jedinica;
- sistem obavještanja i dojave požara;
- postupak u slučaju požara;
- tehnička opremljenost i sredstva za gašenje požara;
- način snabdijevanja vodom za gašenje požara;
- putevi, prolazi i prilazi;
- saradnja sa vatrogasnim jedinicama;
- sanaciono-preventivne mjere za uspješno funkcionisanje, unapređenje i kontrolu;
- sprovođenja mjera zaštite od požara;
- druge mjere predviđene zakonom i pratećim dokumentima;

Član 8.

Plan zaštite od požara mora se redovno ažurirati i usaglašavati sa nastalim promjenama u Zavodu.

2. Opšte mjere

Član 9.

U cilju sprječavanja nastanka požara i njegovog širenja, kao i u cilju efikasnijeg gašenja nastalog požara, svi radnici Zavoda su dužni provoditi, svako u svom djelokrugu rada, slijedeće opšte mjere:

- svaki radnik je dužan svoje poslove i radne zadatke obavljati prema tehničkim i drugim uputstvima, izbjegavajući svaku improvizaciju i neprovjerene postupke koji mogu dovesti do požara i druge nezgode;
- obavezno je svakodnevno čišćenje radnog prostora, uklanjanja raznih otpadaka i smeća izvan Zavoda;
- svim uočenim kvarovima na opremi, uređajima i instalacijama, treba odmah obavijestiti neposrednog rukovodioca;
- zabranjeno je nestručnim licima vršiti bilo kakve intervencije i popravke mašina, uređaja i instalacija;
- sigurnosni i alarmni uređaji koji upozoravaju i obavještavaju o izbijanju požara moraju uvijek biti ispravni i u funkciji;
- zabranjeno je zatvarati otvore za prirodno provjetranje i prekidati rad ventilacionih uređaja;
- posude sa zapaljivim tečnostima i boce tehničkih gasova, smiju se držati i uskladištiti samo u odgovarajućim skladištima, odnosno namjenskim ormarima i to u dnevno potrebnim količinama;
- svi ključevi od objekata i prostorija, glavnih razvoda el. energije, moraju biti označeni sa natpisom na metalnoj pločici, a njih je obavezno držati u odgovarajućem i zvanično određenom mjestu, koje je u neposrednoj blizini dežurnih lica ili lica obezbjeđenja;
- zabranjeno je u krugu Zavoda vršiti spaljivanje otpadaka i loženje otvorene vatre;
- zelene površine u krugu Zavoda, moraju se redovno održavati, tj. kositi trava tako da visina trave i rastinja nije veća od 20 cm; pokošenu travu treba odmah odstranjivati i odlagati na određeno mjesto;

Član 10.

Svi objekti Zavoda mogu se zagrijavati putem sistema centralnog grijanja, pomoću odgovarajućih termoakumulacionih električnih radijatora ili putem klima uređaja.

Svaki radnik u svojoj radnoj prostoriji, poslije završenog rada i prije napuštanja objekta i prostorije, dužan je isključiti sve električne aparate.

3. Građevinske mjere

Član 11.

Rekonstrukcija, adaptacija i dogradnja postojećih objekata, mora se vršiti na osnovu odgovarajuće tehničke dokumentacije, koja mora sadržavati i mjere zaštite od požara, a što se utvrđuje pregledom tehničke dokumentacije od strane ovlaštene stručne organizacije.

Član 12.

Zabranjeno je mijenjati projektovanu namjenu objekata i prostorija bez odobrenja nadležnog organa i poduzimanja mjera zaštite od požara.

U neposrednoj blizini objekata za skladištenje i držanje zapaljivih materija, mora se postaviti predviđeni broj aparata za početno gašenje požara.

Član 13.

Požarni putevi moraju neprekidno biti slobodni i prohodni cijelom svojom širinom. Svi prilazni putevi do objekata, kao i unutrašnje komunikacije u objektima (hodnici, stepeništa, vrata itd.) moraju uvijek biti slobodni i prohodni cijelom svojom širinom.

Član 14.

U svim objektima moraju se obezbijediti odgovarajući prilazi do izlaznih vrata, hidranata, vatrogasnih aparata i glavnih razvodnih baterija električne energije.

Član 15.

Zabranjeno je parkiranje vozila na požarnim putevima oko objekata, kao i na prostorima Zavoda koja nisu predviđena za to, a za te svrhe treba koristiti odgovarajuće uređena parkirališta koja ne smetaju prilazu objektima. Poslovni partneri i lica koja koriste usluge pojedinih prostora Zavoda mogu koristiti parking prostore namjenjene za tu svrhu.

4. Elektro-mjere

Član 16.

U objektima i radnim prostorijama Zavoda dozvoljena je upotreba samo onih električnih uređaja i instalacija, koje po svojim tehničkim karakteristikama odgovaraju tehničkim propisima i pogonskim zahtjevima.

Električni uređaji i instalacije moraju biti tako izvedeni i zaštićeni da uslijed djelovanja pogonskih uslova (vlaga, prašina, zapaljive pare i gasovi, mehanička oštećenja, toplotni i hemijski uticaji itd.), ne bude ugrožena sigurnost ljudi, objekata i predmeta rada.

Član 17.

Prema tehničkim propisima i uputstvima, te propisanim rokovima, obavezno je vršiti kontrolu ispravnosti i odgovarajuća mjerenja električnih uređaja i instalacija, te preduzimati mjere na otklanjanju uočenih nedostataka.

Popravke i druge radove na električnim instalacijama, mogu vršiti samo stručno osposobljena lica, koja, prije bilo kakve intervencije, moraju instalacije dovesti u beznaponsko stanje.

Član 18.

Razvodne baterije i ormari moraju imati prekidač na glavnom dovodu električne energije. Sva oprema u razvodnim baterijama i ormarima, mora biti označena prema jednopolnoj šemi koja se mora nalaziti u ovim razvodima.

Osigurači u razvodima ne smiju se krpiti nego se mijenjaju samo novim osiguračima iste nazivne snage, a bimetali moraju biti podešeni na normalnu struju motora.

Član 19.

U prostorijama ugroženim od požara i eksplozije, instalacije se moraju izvoditi sa uređajima koji neće prouzrokovati požar ili eksploziju, S – uređaji (prekidači, sklopke i sl. koji su ugrađeni u zaštitne oklope ili drugu vrstu zaštite za sprječavanje pojave iskre u okolnom prostoru pri uključivanju/isključivanju uređaja).

U prostorima u kojima se pojavljuje vlaga i voda, nulovanje provoditi koristeći posebne materijale i zaštitne vodove.

Član 20.

U objektima, odnosno prostorijama izgrađenim od zapaljivih materijala, zaštitu napona dodira izvesti strujnim zaštitnim sklopkama (ZS) jer one kontrolišu zaštitu sa aspekta požara.

Član 21.

Zgrada Zavoda, kao i svi ostali objekti, moraju biti obezbjeđeni sa odgovarajućim klasičnim gromobranskim instalacijama u skladu sa odredbama tehničkih propisa sa gromobranima.

Član 22.

U slučaju potrebe za korištenjem tehničkih gasova i posuda sa zapaljivim tečnostima, obavezno se, pored drugih propisanih mjera, primjenjuju i sljedeće mjere zaštite od požara, kao i radna uputstva:

- sa svim materijama mogu rukovati i raditi samo oni zaposlenici koji su za to stručno osposobljeni (posebnim kursom) i službeno određeni da to rade;
- električne instalacije u prostorima u kojima se drže zapaljive materije moraju biti posebno osigurane.
- zabranjeno je bilo kakvo pretakanje plina iz boca u zatvorenom prostoru;

5. Obaveze i prava radnika u pogledu kontrole i sprovođenja propisa iz oblasti zaštite od požara i radnih uputstava

Član 23.

Svaki radnik Zavoda ima slijedeće obaveze, prava i odgovornosti iz oblasti zaštite od požara:

- obavezanje da svoje poslove i radne zadatke obavlja stručno i savjesno kako bi se izbjegla svaka opasnost za nastanak i širenje požara, i svaka havarija i nezgoda;
- obavezan je da se pridržava svih uputstava, pravila, propisa i mjera zaštite od požara;
- dužan je i ima pravo da prije raspoređivanja na poslove i radne zadatke bude upoznat sa svim požarnim opasnostima, mjerama zaštite od požara, praktičnoj upotrebi opreme i sredstava za gašenje požara, materijalnom i drugom odgovornošću zbog nepridržavanja propisanih mjera zaštite od požara;
- dužan je da usavršava svoja znanja iz oblasti zaštite od požara, te ima pravo da predlaže mjere za poboljšanje i unapređenje sistema zaštite od požara kroz sistem obavezne obuke;
- obavezan je da upozorava svoje radne kolege na propuste iz domena zaštite od požara, te da o tim propustima izvještava neposrednog rukovodioca;
- dužan je da neposrednom rukovodiocu odmah prijavi svaki uočeni kvar ili sumnjivu pojavu u procesu rada koja može imati za posljedicu pojavu požara i njegovo širenje;
- obavezan je da vizuelno svakodnevno kontroliše ispravnost opreme, aparata i sredstava za gašenje požara, te da svaki uočeni kvar ili nedostatak, odmah prijavi neposrednom rukovodiocu;
- dužan je odmah pristupiti gašenju uočenog požara sa svim raspoloživim sredstvima;
- dužan je da prije početka rada provjeri ispravnost sredstava rada, te da po završetku rada, a prije napuštanja radne prostorije, poduzme sve propisane mjere da se spriječi nekontrolisano izbijanje požara;
- dužan je raditi duže od radnog vremena u slučajevima kada je neophodno spriječiti izbijanje požara i drugih havarija;

- ima pravo da odbije raditi određene poslove, ako ocijeni da prijeti neposredna opasnost za njegovo zdravlje i život od požara i eksplozije;
- ima pravo zahtijevati da se u sklopu odvijanja procesa rada na vidno mjesto istaknu odgovarajuća uputstva za siguran rad i upozorenja na opasnost od požara i eksplozije;

III POSTUPAK I NAČIN UPOZNAVANJA RADNIKA SA OPASNOSTIMA OD POŽARA VEZANIM ZA RADNO MJESTO, I OBUKA ZAPOSLENIKA U RUKOVANJU SREDSTVIMA I OPREMOM ZA GAŠENJE POŽARA

Član 24.

Zavod je dužan obezbjediti da svaki radnik bude upoznat sa opasnostima od požara vezano za radno mjesto na koje je raspoređen, kao i opremom, uređajima i sredstvima za gašenje požara, praktičnom upotrebom aparata i drugih uređaja za gašenje požara, kao i sa materijalnom i drugom odgovornošću uslijed nepridržavanja propisanih mjera zaštite od požara.

Član 25.

Upoznavanje i obuka radnika vrši se po grupama radnika srodnih struka, i to:

- organizovanjem odgovarajućih kurseva, seminara i predavanja po posebnom programu obuke;
- isticanjem na vidnom mjestu odgovarajućih uputstava, natpisa, plakata i upozorenja.

Član 26.

O obuci radnika i provjeri znanja radnika obavezno se vodi odgovarajuća evidencija od strane Zavoda.

Svi radnici su dužni pristupiti obuci i provjeri znanja, a u suprotnom čine povredu radnih obaveza i dužnosti.

Član 27.

Pri radu sa zapaljivim tečnostima, radnici koji rukuju zapaljivim tečnostima i tehničkim gasovima, moraju biti posebno stručno obučeni i osposobljeni za sigurno obavljanje tih poslova.

Ova obuka i provjera znanja radnika vrši se putem posebno organizovanih kurseva. Obuka iz prethodnog stava obavezno se povjerava ovlaštenoj stručnoj organizaciji.

Član 28.

U prostorijama Zavoda nije dozvoljeno: pušiti, proizvoditi, koristiti i prenositi otvorenu vatru i užarene predmete.

IV VRSTA, KOLIČINA I RASPORED OPREME I SREDSTAVA ZA GAŠENJE POŽARA I ROKOVI PROVJERE NJIHOVE ISPRAVNOSTI

Član 29.

Svi objekti i prostorije Zavoda, moraju biti obezbjeđeni potrebnim sredstvima za gašenje požara i dovoljnim brojem odgovarajućih uređaja i opreme za gašenje požara.

Član 30.

Količina i vrsta opreme i sredstava za gašenje požara, te njihov raspored u objektima, prostorijama i prostorima Zavoda utvrđuje se Planom zaštite od požara.

Član 31.

Sva predviđena i instalirana oprema, kao i sredstva za gašenje požara, mora se uvijek nalaziti u ispravnom i funkcionalnom stanju, smještena i raspoređena na predviđena mjesta, propisno označena i obezbijedena od oštećenja, nenamjenske upotrebe i smrzavanja u zimskom periodu.

Član 32.

Kontrola ispravnosti i funkcionalnosti opreme i sredstava za gašenje požara, vrši se jednom u šest mjeseci, a prema uputstvima proizvođača, važećim standardima i tehničkim propisima, koji su označeni na opremi.

Član 33.

Kontroli ispravnosti i funkcionalnosti podliježe sva oprema koja je u funkciji zaštite od požara, kao što su ručni vatrogasni aparati i vanjska i unutrašnja hidrantska mreža, te pripadajuća oprema.

Član 34.

Kada se vatrogasni aparati nose na kontrolu ispravnosti van zgrade, mora se voditi računa da se objekti ni u jednom momentu ne ostave bez minimalno potrebne opreme, kao i to da se kontrola aparata obavi u roku od 24 sata.

Član 35.

Oko svih uređaja i opreme za gašenje požara moraju se uvijek osigurati prilazni putevi i slobodan prostor oko njih, a u zimskom periodu hidranti moraju biti obezbijedeni od smrzavanja vode u njima.

Opremu i sredstva za gašenje požara zabranjeno je koristiti u nenamjenske svrhe, u suprotnom čini se povreda radnih obaveza i dužnosti.

V ODGOVORNOSTI RADNIKA ZAVODA ZBOG NEPRIDRŽAVANJA PROPISANIH MJERA ZAŠTITE OD POŽARA

Član 36.

Svaki radnik Zavoda koji ne poštuje odredbe ovog Pravilnika i njegovih pratećih uputstava, odredbe zakonskih i tehničkih propisa iz oblasti zaštite od požara, te ne sprovodi propisane mjere zaštite od požara, čini težu povredu radnih obaveza i dužnosti, za koju se može izreći odgovarajuća disciplinska mjera, shodno odgovarajućem opštem aktu.

Član 37.

Ako radnik u vršenju poslova i radnih zadataka (ili pacijent tokom pregleda), prouzrokuje materijalnu štetu svojom krivicom, a u vezi sa nepridržavanjem propisanih mjera zaštite od požara, dužan ju je nadoknaditi, kako je to regulisano u odgovarajućem opštem aktu.

Član 38.

Kao teža povreda radne obaveze iz oblasti zaštite od požara smatra se, naročito:

- zazivanje požara, namjerno ili iz nehata;
- upotreba otvorene vatre ili pušenje u prostorijama Zavoda, a naročito kod korištenja zapaljivih tečnosti i gasova;
- zloupotreba ili nenamjenska upotreba vatrogasnih aparata, sprava i opreme za gašenje požara, kao i njihovo namjerno oštećenje;
- izbjegavanje, ometanje ili odbijanje učešća u akcijama gašenja požara i spašavanja lica i imovine ugrožene požarom;

- neprijavljivanje požara ili nepoduzimanje mjera za gašenje požara i spašavanja lica i imovine ugrožene požarom;
- neisključivanje pogonske energije po završetku rada;
- ostavljanje neočišćenog radnog mjesta po isteku radnog vremena, što može imati teže posljedice za nastanak i širenje požara;
- zatvaranje ventilacionih otvora i neovlašteno isključenje sistema ventilacije;
- neovlašteno blokiranje rada sigurnosnih i alarmnih uređaja;
- blokiranje vanjskih i unutrašnjih požarnih i komunikacionih puteva, te prilaza do objekata, vatrogasnih sprava i opreme i baterije električne energije;
- držanje lako zapaljivih tečnosti i boca tehničkih gasova u radnim prostorijama u količinama većim od dozvoljenih;
- upotreba i držanje lako zapaljivih tečnosti i boca tehničkih gasova na zabranjenim mjestima;
- neobavljanje periodičnih pregleda ispravnosti i funkcionalnosti sprava, opreme, aparata, uređaja i instalacija, koji su u funkciji zaštite od požara;
- izbjegavanje sprovođenja propisane kontrole i mjera zaštite od požara;
- neobezbjedenje objekata i radnih prostorija sa vatrogasnim aparatima i drugom opremom za gašenje požara;
- nepristupanje obuci i provjeri znanja iz oblasti zaštite od požara.

VI DUŽNOSTI I PONAŠANJE RADNIKA U SLUČAJU IZBIJANJA POŽARA

Član 39.

Svaki radnik koji primijeti požar, dužan je odmah, bez panike, pristupiti njegovom gašenju i lokalizovanju, ukoliko to može učiniti bez opasnosti za sebe ili druge zaposlenike (pacijente).

Ako prisutni radnici nisu u stanju sami ugasiti požar, dužni su izvršiti dojavu požara dežurnom portiru-čuvaru, odnosno neposrednom rukovodiocu ili profesionalnoj vatrogasnoj jedinici grada.

Član 40.

Dojava požara vrši se telefonom, odnosno na drugi najbrži mogući način.

Kod dojava požara treba saopštiti: mjesto gdje je izbio požar, šta gori, u kom obimu i da li prijeti neposredna opasnost za život ljudi i drugih objekata.

Član 41.

Do dolaska pozvane vatrogasne jedinice na mjesto požara, prisutni zaposlenici na čelu sa neposrednim rukovodiocem, dužni su organizovati gašenje nastalog požara, a posebno trebaju učiniti slijedeće:

- organizovati spasavanje, eventualno, ugroženih radnika i pacijenata;
- obezbjediti isključenje struje u dotičnom objektu;
- zatvoriti odgovarajuća vrata, prozore, ventilacione i druge otvore da se spriječi širenje požara;
- obezbjediti na licu mjesta prisustvo odgovarajućih stručnih zaposlenika (vozač, domar, itd.) koji mogu biti od koristi u akciji gašenja požara;
- poduzeti druge mjere zavisno od date situacije.

Član 42.

U slučaju požara van redovnog radnog vremena, dežurno osoblje u svim organizacionim jedinicama Zavoda je dužno pristupiti gašenju nastalog požara i odmah izvršiti dojavu profesionalnoj vatrogasnoj jedinici grada.

Također, treba na odgovarajući i najbrži mogući način, uzbuniti i dežurne radnike susjednih organizacija, te odgovorne rukovodioce Zavoda.

Član 43.

Svi radnici dužni su da se na poziv direktora ili lica koje on ovlasti, aktivno uključe u akciju gašenja požara i spasavanja imovine i lica, te u toj akciji učestvovati sve dok traje.

Član 44.

Kada na mjesto požara stigne pozvana vatrogasna jedinica, komandir vatrogasne jedinice preuzima rukovođenje akcijom gašenja požara, dok su svi radnici i dežurno osoblje dužni da se stave na raspolaganje rukovodiocu gašenja.

Član 45.

Svaki zaposlenik Zavoda mora poznavati signale internog i javnog uzbunjivanja u slučaju požara i druge opasnosti.

Tablica i natpis sa signalima za uzbunjivanje mora biti vidno istaknuta u holu Zavoda, na svim mjestima na kojima se vrši rad i gdje realno postoje povećane opasnosti od izbijanja i širenja požara, kao i na mjestima na kojima uvijek borave zaposlenici na obezbjeđenju, odnosno domari (portirnica, radno mjesto dežurnog na prijemu gostiju i drugih lica).

VII PRELAZNE I ZAVRŠNE ODREDBE

Član 46.

Za sva prava, dužnosti i odgovornosti radnika iz oblasti zaštite od požara, koji nisu regulisani ovim Pravilnikom, važe odredbe zakona iz oblasti zaštite od požara.

Član 47.

Izmjene i dopune ovog Pravilnika vrše se na način i po postupku kao i za njegovo donošenje.

Član 48.

Ovaj Pravilnik stupa na snagu danom donošenja.



v.d. Direktorica

Dr Naida Tiro, spec. neuropsihijatar

Sarajevo, 06.01.2016.
Broj: 01-94/16